

BCU - Lausanne



1094788377

312

REC.

Baumg. Gesigiste der Religi. Parth.
f. 70.

Præadamitæ 1655. 4.

ord. Ejurd. Epistola ad Philotemum
qua exponit rationes, propter quas
ejuraverit sectam Calvini et
libram de præadamitæ.

J



[Isaac de La Peyrère]
PRÆ-ADAMITÆ.

S I V E

EXERCITATIO
super Versibus duodecimo,
decimotertio, & decimoquarto,
capitis quinti Epistolæ D. Pauli ad Romanos.

U1789

Quibus inducuntur

Primi Homines ante Adamum
conditi.



A N N O S A L U T I S .

M . D C . L V .

BIBLIOTHÈQUE CANTONALE
LAUSANNE
ET UNIVERSITAIRE

UNIVERSITÉ
DE LAUSANNE
BIBLIOTHÈQUE
CENTRALE
2

E L E N C H U S

C A P I T U M

quæ continentur in Exer-
citatione.

C A P U T . I.

Verba Apostoli. Imputationem peccati
cœpisse à transgressione legis Dei,
quam Adamus violavit : desisse in
Christo. Antithesis inter Adamum & Chri-
stum. *Pag. 7*

II. De lege Dei data Adamo. Item de variis
legibus humanis & divinis, quæ fuerunt
ante legem Dei datam Mosi. 8

III. De quatuor hominum statibus: sub na-
tura: sub lege: sub gratia: sub gloria. Tem-
pus legis statuendum esse ab Adamo, non
à Mose. 11

IV. Peccatum fuisse imputatum ab Adamo
usque ad Mosem. 13

V. Probatur idem quod superiori capite pro-
batum est. 15

VI. Infantes peccavisse ad transgressionis A-
dami similitudinem. Et de variis similitu-
dinis acceptionibus. 16

VII. Infantes peccavisse ad transgressionis
Adami similitudinem, secundum superio-
res omnes acceptiones similitudinis. 18

- VIII. **Anxietas interpretum in explicatio-
ne horum versuum. Statuere, primos ho-
mines creatos ante Adamum, neque offi-
cere doctrinæ Christianæ, neque historiæ
Geneseos: imo utramque elucidare. Con-
gruere omnino cum historiis & monu-
mentiis Gentium.** 20
- IX. **Textus Apostoli. Analysis versus duo-
decimi. De imputatione peccati, & de re-
gno mortis.** 23
- X. **Analysis versus decimi tertii. Legem hic
intelligendam, datam Adamo. Assertitur
vulgata lectio.** 24
- XI. **Analysis versus decimi quarti. De regno
mortis ab Adamo usque ad Mosem. Mo-
sem hic sumi pro lege data Mosi.** 26
- XII. **Duo tempora notari ab Apostolo. U-
num, à lege. Alterum, ante legem. Sive,
quod idem est, Unum ab Adamo; Alterum;
ante Adamum.** 27
- XIII. **Creati homines ante Adamum non
peccaverant ad similitudinem transgressio-
nis Adami. Legendum hic, *peccaverant*, non
peccaverunt.** 29
- XIV. **Peccatum dari materiale & formale:
non imputatum, & imputatum. Similitu-
dinem transgressionis Adami positam in
imputatione, non actu transgressionis
ejus.** 30
- XV. **Quæ sit vera similitudo transgressionis
Adami, per Oseam Prophetam.** 32
- XVI. **Ne-**

XVI. Neminem potuisse unquam peccare actualiter sicut Adam peccavit. Infantes verius peccavisse ad similitudinem transgressionis Adami quam adultos. Legem Moisaicam expressam ad similitudinem legis Adamicæ. Legem Adamicam hoc loco intelligendam. 34

XVII. Peccata facta ante legem, neque imputata, neque ad similitudinem transgressionis Adami. Peccata facta post legem, imputata, & facta ad similitudinem transgressionis Adami. De peccato mortuo, & vivis hominibus ante legem & Adamum. 36.


XVIII. Introducitur vivus homo absque lege, vel ante legem & Adamum, loquens secundum mentem D. Pauli. 37

XIX. Peccatum Adami fuisse retro imputatum primis hominibus ante Adamum conditis: & damnationem mortis ex illo peccato, retro regnavisse in illos. Qua de causa illud fieri debuerit. 40

XX. Peccata præcedentia, de quibus locutus est D. Paulus cap. 3. hujus epistolæ; eadem esse quæ facta ante legem & Adamum; quia legem & Adamum præcesserunt. 41

XXI. Quomodo censeripotest, peccatum Adami fuisse retro imputatum primis hominibus ante Adamum conditis: necnon damnationem mortis ex illo peccato, retro regnavisse in illos. 42

XXII. Analysis continua horum versuum Apostoli.	44
XXIII. Adamum dici primum hominem, qua ratione Christus secundus homo est.	46
XXIV. Adamum dici primum hominem, qua ratione primus homo peccator est. Imputationem peccati Adamici non fluxis- se ex Adami traduce.	48
XXV. Explicatur D. Paulus Actorum capi- te 17. Ex uno sanguine, non esse, ex uno Adamo.	50
XXVI. Exercitationis epilogus.	51



EXER-

EXERCITATIO

Super Versibus, duodecimo, decimotertio, & decimoquarto, capitis quinti, Epistola D. Pauli ad Romanos.

CAPUT I.

Verba Apostoli. Imputationem peccati cœpisse à transgressione legis Dei, quam Adamus violavit: defuisse in Christo. Antithesis inter Adamum & Christum.



Aulus Apostolus, Epistola quam scripsit ad Romanos, capite quinto, versibus 12, 13, & 14. hac ait.

XII. Sicut per unum hominem peccatum intravit in Mundum, & per peccatum mors: ita etiam in omnes homines mors pervasit, in quo omnes peccaverunt.

XIII. Nam usque ad legem peccatum erat in Mundo. Peccatum vero non imputabatur, non existente lege.

XIV. Regnavit autem mors ab Adamo usque ad Mosem: In eos etiam qui non peccaverant ad similitudinem transgressionis Adami; qui est typus futuri.

Vulgati Interpretes explicant illud, Usque ad legem, decimotertii versus; de tractu illo temporis qui intercessit ab Adamo usque ad Mosem. Per quod tempus statuunt peccatum quidem fuisse in Mundo, sed non datum fuisse crimini; sive non fuisse imputatum, ut vulgo dicitur. Statuunt, inquam, peccatum cœpisse imputari à Mose, non autem ab Adamo.

Verum hoc (præfabor pacem tantorum Virorum) pugnare mihi videtur fronte adversa, cum eo quod voluit dicere Apostolus: imo quod significanter expressit, quamvis leviter attingisse videatur. Voluit enim illud, & hic est sensus perpetuus hujus loci. Homines à Deo depulso propter

unum hominem-peccatorem, rediſſe in gratiam propter unum Hominem-Deum, Peccatum intraviſſe in Mundum, per unum hominem peccatorem, qui legem Dei prætergreſſus eſt: abſolutionem de peccato illo, qua Jukitia & Juſtificatione appellatur, intraviſſe in Mundum, per unum Hominem-Deum, qui legi divina paruit, & piacularis factus eſt ob culpam illius hominis peccatoris. Hominem illum peccatorem typum fuſſe, ſed typum oppoſitum, hujus hominis Dei. In hac tamen oppoſitionis comparatione voluit Apoſtolus, imputationem, ut ita dicam, fuiſſe gratiam hujus hominis-Dei, transgreſſione hujus hominis-peccatoris: potiore hujus juſtificationem reatu illius: plenius & potentius hujus obſequium illius per vicacia. Ubi perpetua viget antithēſis inter illum & hunc. Ille eſt Adamus, hic eſt Ieſus Chriſtus. Ille eſt primus Adamus, hic eſt ſecundus Adamus.

Voluit item Apoſtolus, per temeratam illam primam legem Dei, ab illo primo homine Adamo, homines omnes inimicos & hoſtes Dei evaſiſſe: per transgreſſionem illius legi omnes homines peccaviſſe: per contumaciam illius hominis, omnes homines peccatores effectos: per illud peccatum, quod eſt transgreſſio illius legi, mortem pervaviſſe in omnes homines, mortem regnaviſſe. Illud autem demonſtravit Apoſtolus evidentiffime: nec cœcutire poſſumus in tanta luce, niſi forte quia nimia eſt. Nimirum ut nobis conſtet, imputationem peccati cœpiſſe à transgreſſione legi Adamo data, non autem a lege data Moſi. Cœpiſſe ab Adamo, deſiſſe in Chriſto. Nulla enim hic antithēſis inter Moſem & Chriſtum. Typum, ſive antitypum Chriſti unicum, conſtitui hoc capite Adamum D. Paulus.

C A P U T II.

De lege Dei data Adamo. Item de variis legibus humanis & divinis, quæ fuerunt ante legem Dei datam Moſi.

LEx Dei data Adamo illa fuit, cujus transgreſſio, ut prædixi, Adamum, & in illo omnes homines fecit hoſtes

hostes Deo : qua armavit Angelum ense fulmineo , ut illum , & in illo omnes homines Paradiso detruderet. Lex Dei illa fuit , qua Adamum , & in illo omnes homines effecit peccatores , reos , contumaces : per quam peccatum intravit in Mundum : per quam omnes homines peccaverunt : per quam mors pervasit in omnes homines. Et de illa lege intelligenda sunt verba hęc Apostoli : Usque ad legem peccatum erat in Mundo. Quippe qua lex Adami , vel data Adamo , princeps fuit legum omnium. Qua lex legum , & per excellentiam Lex simpliciter dici debuit.

Reliqua leges sua nomina sortita sunt. Lex enim naturalis est , qua dicitur recta ratio : unde leges gentium orta sunt : à quibus itidem fluxerunt leges civiles , qua secundum varios Legumlatores varia sibi induerunt nomina. Tales olim fuerunt , vel duriores Lycurgi leges , vel molliores Solonis constitutiones , vel qua tulere strictiora jura Decemviri , vel qua edixere remissiora Prætores.

Imo & leges Dei varias indictas fuisse Judais , longe ante legem datam Mosi , constat ex Genesi ipsa , cap. 26. ubi Deus Isaacum affatur hu verbis. Benedicentur in semine tuo omnes Gentes terræ , eo quod obedierit Abrahamus voci meæ , & custodierit præcepta & mandata mea , & ceremonias legesque servaverit. Quibus patet manifestissime , præcepta & mandata Mosaisca non fuisse prima præceptorum & mandatorum Judais præscriptorum , ut creditur : Ceremonias Mosaiscas non fuisse primas Ceremoniarum Judaicarum , ut creditur : Leges Mosaiscas non fuisse primas legum Judaicarum , ut creditur. Sed longe ante Mosem præcepta & mandata alia statuta Judais ; ceremonias alias institutas ; & leges alias Dei populo huic sancto & electo decretas & sancitas fuisse. Judæos autem hoc loco intelligo : non filios Abrahami tantum , qui vocantur semen Abrahamæ ; sed & patres omnes Abrahami ipsius , Adami posteros.

Verum inquires : Qua præcepta & mandata legimus præscripta unquam fuisse Judais ante Mosem ? Laudabo sanctificationem Sabbati : mundorum & immundorum discretionem : abstinentiam à suffocatiu : qua

legimus mandata & praecepta fuisse Iudaeis longe ante Mosem. Quas inquires caeremonias legimus ante Mosem fuisse unquam in usu apud Iudaeos? Caeremonias laudabo illas, quibus sacrificiorum ritus constitit apud Iudaeos, longe ante Mosem. Quin & cultus Dei varios institutos: ab Adamo, usque ad Enos filium Sethi: ab Enos filio Sethi, usque ad Abrahamum: ab Abrahamo usque ad Mosem. Scriptum nimirum est Geneseos cap. 4. Sed & Seth natus est filius, quem vocavit Enos. Ille coepit invocare in nomine Domini. Certe invocabatur Dominus nomine aliquo, ab Adamo & Setho, ante Enos. Sed invocare coepit Enos Dominum nomine alio, quo Adamus & Sethus illum invocaverant. Additam vero legimus circumcisionem Abrahamo. Et revelatum nomen Jehovæ, Mosi; Iudaeis antea inauditum.

Quas vero legimus, inquires, sancitas unquam fuisse leges Iudaeis, ante legem Mosi? Leges asseram audacter illas, quas hoc loco Geneseos servavisse dicitur Abrahamus. Imo, secundum quas notum est, longe ante Mosem, honoratos fuisse parentes à filiis suis: animadversum in homicidas: prohibita adulteria: interdicta latrocinia imo & vitam concupiscentiam, scelerum causam & fomitem. Qua omnia vulgus Theologorum putat initium habuisse à Mose tantum: quamvis certissimum sit, communia illa fuisse legum omnium divinarum & humanarum: instituta & observata longe ante Mosem. Utpote qua emanaverint, non à Mose, ut vulgo creditur; sed à jure ipso naturali, gentium, & civili: imo à praecepto ipso divino, longissime ante Mosem.

Lex sane Mosaica jus suum, illudque praeipuum, habuit apud Iudaeos; sed suum successive tempus, distinctum ab aliis & primis legibus Iudaicis. Qualis mos est apud omnes populos, quorum posteriores leges priores antiquant. Imo proprie constitit lex Mosaica in caeremoniis peculiaribus; in peculiari ratione sacrificiorum; & in peculiari jure Sacerdotii. Qua non erant in usu ante Mosem; & à Christo abrogata sunt.

Nullibi autem scriptum est, peccatum fuisse imputatum omni generi humano, propter leges illas violatas, sive

sive naturales, sive gentium, aut civiles: propter temperatas leges illas Dei, qua in desuetudinem abierunt: propter abdicatam circumcissionem, & inobservatum Moysen. Sed scriptum est disertissime & conceptissime, peccatum intravisse in Mundum, per legem perruptam ab Adamo: Imputatam fuisse transgressionem legis illius omnibus hominibus: & per transgressionem legis illius mortem pervasisse in omnes homines. Unde innotescat, legem datam Adamo, tanquam generalissimam, & legem legum, Legem simpliciter dici & audire debuisse hoc loco.

CAPUT III.

De quatuor hominum statibus: sub natura: sub lege: sub gratia: sub gloria. Tempus legis statuendum esse ab Adamo, non à Mose.

Status hominum optime partiti sunt, qui illos quadrisariam dividerunt, posueruntque hoc ordine: primum, sub natura: secundum, sub lege: tertium, sub gratia: ultimum, qui erit sub gloria. Allucinari mihi videntur qui numerant tempus legis à Mose, quod statui debuit ab Adamo. Tempus inquam legis illius de qua hic dedita opera egit Apostolus. Locutus enim est de lege illa, in cuius transgressionem homines omnes peccaverunt: & de illo homine qui legem illam perfregit, in quo mors pervasit in omnes homines. Qua omnino conveniunt legi data Adamo, & Adamo ipsi: nullo modo autem legi Mosaica, neque Mose ipsi. Iudaei enim soli peccaverunt in transgressionem legis Mosaicae. Iudaeos solos affatus est Deus cum legem illam Mosaicam promulgavit. Neque iuste & iuridice actum fuisset cum omnibus hominibus, si mors pervasisset ex transgressionem illius legis, in illos etiam homines quibus lex illa non data fuisset: atque adeo qui nullo pacto, & nullo foedere sancito, lege illa tenebantur.

Moses certe missus fuerat Iudaeis solis; non ut in quo Iudaei peccarent: id est, non ut Iudaei peccarent in Mose peccante: sed ut unicuique Iudaeo sua sibi legis illius Mosaicae transgressio imputaretur. Res non ita

se habuit in Adamo. Peccaverunt omnes homines in transgressione legis illius quam Adamus egressus est. Peccatum illud quod sibi soli peccavisse visus est Adamus, transit in omnes homines, qui peccaverunt in Adamo peccante Ratio est; quia lex illa data Adamo, lata fuit omnibus hominibus. Et quo momento allocutus est Deus Adamum, cum legem illam suam ei dabat, allocutus est homines omnes. Ita ut juste & juridice egerit Deus cum omnibus hominibus; quando mors in illos pervasit ex peccato Adami, & transgressione legis illius quam Adamus violavit. Quia lex illa putata fuit data omnibus hominibus; qui involuti & astricti fuerunt pacto & fœdere illo, quod Deus cum omnibus hominibus in Adamo, tanquam Syndico & defensore omnium hominum, pepigerat; & percusserat.

Quæ cum ita sint, atque adeo certa ut de illis dubitare religio sit: fateor me non intelligere, qua ratione tempus illud legis quod quarimus, non debuerit assignari ab Adamo. Lex enim primùm data Adamo, denotat evidenter, legem primùm cœpisse ab Adamo. Imo legem illam de qua hic loquitur Apostolus; à qua fluxit imputatio peccati. Quæ imputatio cœpit esse ab Adamo, à quo & regnum legis cœpit esse.

Hujus autem rei veritatem quid attinet quævere per alium interpretem quam per Apostolum hoc loco? Nullum scilicet fuit regnum mortis, quod non prius pependerit à regno peccati: nullum quineziam regnum peccati, quod non prius pependerit à regno legis: legis inquam illius, à cujus transgressione peccatum imputari, mors regnare cœpit. Causa igitur antecedens & primigenia peccati & mortis, constituenda est Lex eadem. Atqui regnum mortis cœpit esse ab Adamo per Apostolum ipsum hoc loco. Regnavit mors ab Adamo usque ad Moysen. Cœperit ergo necesse est multo magis regnum legis ab Adamo ipso, per eundem Apostolum loco eodem. Regnavit lex data Iudæis in Moysen, à Moysen ipso. Regnavit lex data omnibus hominibus in Adamo, ab Adamo ipso. Regnavit inquam lex ab Adamo, usque ad Moysen: vel usque ad Iesum Christum. In quo scilicet, lex omnis, Adamica & Mosaica, & tempus

pus ipsum perit legis utriusque. Utpote, à quo tempus Gratia caperit esse.

Conueniens ergo est ut definiamus & circumscribamus tempus Legis, ab Adamo ad Christum. Qua ratione definiamus & circumscribemus tempus Gratia, à Christo quando venit in carne, ad eundem Christum cum venerit in spiritu ad Gloriam: qua erit in aeternum.

CAPUT IV.

Peccatum fuisse imputatum ab Adamo usque ad Mo-
sem.

Sed neque illud assequi possum, quantumvis meditatione contendam: qua ratione probari possit, peccatum non fuisse imputatum per totum illud tempus quod fluxit ab Adamo usque ad Mosem. Contrarium enim colligitur ex locis omnibus Geneseos.

Incipiam ab Adamo ipso. Quare ergo peccatum fuit imputatum Adamo ipsi? Quare imputatum omnibus hominibus, qui in illo peccaverunt? Quare fugatus Adamus, & in Adamo fusi omnes homines Paradiso? Quare maledicta terra propter peccatum Adami, nisi terra, & toti mundo fuit imputatum? Quare timuit Cainus qui occiderat fratrem suum, cum dixit Deo: Major est iniquitas mea quam ut veniam merear? Quare major iniquitas, si non magis imputata? quare deneganda Caino venia, si non imputanda Caino iniquitas? Quare dixit Lamech uxoribus suis: Quoniam occidi adolescentulum in livore meo; septuplum ultio dabitur de Caino: de Lamecho vero septuagesies septies? Quare ultio dabatur de peccato, quod non putabatur esse peccatum? quare ultionis, nisi fuissent imputationis gradus? Quare legimus Deum flagellavisse Pharaonem plagis maximis, propter Sarai uxorem Abrahami: nisi reputavisset Deus adulterium & Regi & regno? Quare dixisset Deus de Sodomitis: Aggravatum est peccatum eorum? Quae fuit illa peccati aggravatio, nisi peccati imputatio? Et si tunc temporis nulla fuissent imputationes; quare justitia decem lusorum, si degissent Sodomis, reputata fuisset reliquis Sodomitis in justitiam: qua illorum peccata, qua

qua peccatorum clamores & aggravationes, id est imputationes, substulisset? Quare per illud tempus imputata fides Abrahamo, per quam imputatio peccati auferenda erat? Remedium certe præsупponit morbum. Imputatio fidei præsупponit imputationem peccati. Quare percussisset Deus Onanum eo quod fecisset Rem detestabilem? Quare illa detestabilis; si non imputanda, qua percussione vindicanda foret? Quare noluit Iuda polluere manus suas sanguine Iosephi fratris sui? Quare fuit illa pollutio quam timuit, si non est imputatio? Locuti sunt ad invicem fratres Iosephi, credentes non intelligi: remordebat eos quod in illum peccaverant. Idcirco, agebant, venit super nos ista tribulatio. Et inferius Ruben; Nonne dicebam? Nolite peccare in puerum. En sanguis eius exquiritur. Nimirum exquisitio sanguinis, imputatio effusi erat. Quare Moses & ipse, ante legem suam latam, præcipiti cursu aufugit in desertum, propter occisum Ægyptium; nisi supplicium veritus est à ludicibus Ægyptii, qui ejus sanguine parentassent occiso Ægyptio? Quare ergo ab Adamo usque ad Mosem, instituta fuerunt sacrificia, qua fuerunt peccatorum expiationes; nisi fuerunt per illud tempus peccatorum imputationes? Ratio enim postulat, ut quod remittitur, non imputetur, quod imputatur, vindicetur.

Quod si demum nobis licet, ut par est, iudicium ferre de reatibus & imputationibus peccati, per pœnas qua sequuntur reatus & imputationes peccati: nullum certe peccatum fuit aque imputatum, à Mose usque ad nos, qualia fuere imputata ab Adamo usque ad Mosem. Non enim dicuntur cataraëta cœli effusa, vel fornaces supera descendisse & crepitavisse, in perniciem hominum peccantium à Mose usque ad nos; qualia leguntur de diluvio, & de conflagratione Sodomitarum, ab Adamo usque ad Mosem.

CAPUT V.

Probatum idem quod superiori capite probatum est.

Verum, quid procul à me quæro quod juxta me est, quodque in hoc textu est? Quare dixit Apostolus, peccatum intravisse in mundum per Adamum; &

Et per peccatum mortem? Ad quid enim intravit peccatum in mundum, nisi ut mundo imputaretur? Qua enim est irruptio illa peccati in mundum; si non est imputatio peccati, qua ab Adamo involvebat mundum sub condemnationem mortis, ex peccato Adami? Quod vero expressius argumentum imputationis expressissima potuit adduci quam illud; quo censentur homines omnes inimici, & facti hostes Deo? Qua rursus major imputationis nota potuit inuri peccato illi, vel potuit exprimi ab Apostolo; quam pœna mortis qua tale peccatum ultra est? Qua enim est relatio mortis ad peccatum, eadem est ultionis ad imputationem. Apostolus autem asseruit ipsissimis verbis hoc loco; Mortem regnavisse ab Adamo usque ad Moysen. Regnavisse; per imputationem peccati. Contra enim rerum ordinem regnavisset mors, per illud tempus quod intercessit ab Adamo usque ad Moysen; nisi per illud etiam tempus imputatum fuisset peccatum. Quorsum enim pœna, ubi non est reatus? Quid porro reatus est, si non est imputatio? Sunt certe hac reciproca, pœna & reatus, mors & peccatum. Pœna præsупponit reatum; mors præsупponit peccatum. Regnavit mors ab Adamo. Recte concludetur, Ergo imputatum fuit peccatum ab Adamo. At si voluisset Apostolus, peccatum non fuisse imputatum ab Adamo usque ad Moysen, sed cœpisse imputari à Mose: nec debuerat dicere, mortem regnavisse ab Adamo. Imo illud tantum; regnavisse à Mose usque ad Iesum Christum, qui finis fuit legi Mosaica: per quod tantummodo tempus intelligunt Interpretes peccatum fuisse imputatum.

Hoc autem me magis movet: quod interpretes ipsi vertentes verba hac versus 18 hujus capituli: Ἀπὸ ἑνὸς ἁδὲ ἰὸς ἁμαρτίας εἰς πάντας ἀνθρώπους εἰς κτάνην: transfulerunt hoc modo. Sicut per unam offensam (intelligunt autem offensam Adami) reatus venit in omnes homines in condemnationem. Quare subaudi verunt Interpretes reatum illum, qui non est in Græco? Quis est reatus ille ex offensa Adami, si non est imputatio ex offensa Adami? Patet ergo per ipsos etiam Interpretes: peccatum fuisse imputatum ab Adamo, per totum illud tempus quod ab illo usque ad Moysen interjectum est.

CAPUT VI.

Infantes peccavisse ad transgressionis Adami similitudinem. Et de variis similitudinis acceptionibus.

AT, quam facile abyssus abyssum invocat, tam proclive est, incommodum sequi incommodum. Hinc factum est quod interpretes, qui noluerunt, peccatum fuisse imputatum ab Adamo usque ad Moysen; cum venerunt ad illam partem decimi quarti versus hujus capituli, qua dicitur, Mortem regnavisse, in eos etiam qui non peccaverant ad similitudinem transgressionis Adami: cogitaverunt dissimilitudinem inter peccata adultorum, & peccata infantium: inter peccata actualia, & peccata originalia: de quibus nec minimam facit hic mentionem Apostolus: hic enim non erat huius locus. Voluerunt scilicet interpretes, Apostolum intellexisse hoc loci; Infantes non peccavisse ad similitudinem transgressionis Adami, quia non peccaverant actualiter quemadmodum Adamus peccaverat. In eos tamen mortem regnavisse sicut in adultos, qui peccaverant actualiter, quemadmodum (ut autumat) Adamus peccaverat: ac proinde (ut sibi volunt) ad transgressionis Adami similitudinem.

Verum quarerem: Quare ratione potuisset mors actualiter regnare in Infantes, quemadmodum mors eadem regnaverat in Adamum: nisi Infantes actualiter peccavissent quemadmodum Adamus peccaverat? Quare ratione, inquam, potuissent Infantes mori revera & actualiter, ad similitudinem mortis qua infligebatur ex peccato Adami: neque peccavisse revera & actualiter, ad similitudinem transgressionis & peccati ipsius Adami? Prasertim, cum mors sit peccati opsonium, ut loquitur Apostolus capite 6. hujus epistola; & sequatur naturam, qua similitudo est, peccati sui.

Quarerem rursus: Qui fuissent illi adulti, vel qui fuissent illi infantes, ante Adamum geniti, qui peccavissent vel non peccavissent ad similitudinem peccati Adami? Dixit enim disertissime Apostolus: Mortem regnavisse ab Adamo, in eos etiam qui non peccaverant.

Εἰ τὸν τὴν μὴ ἀμαρτίαν γεννηθέντων. Τὸ, peccaverant, denotat

tempus precedens tempus illud primum, quo mors regnare cepit. tō, etiam, denotat aliquid quod extra ordinem videtur: Mortem scilicet regnavisse, retro etiam à suo principio. Neque sane tam facile esset expedire se ab his incommodis, si pressius urgerentur.

Sed his omisis, ulterius progredior: proboque, Apostolum intellexisse; Infantes etiam Adami nepotes peccavisse ad ejus transgressionis similitudinem. Dixit enim, omnes homines: non aetatem distinxit: neque enim adultus magis est homo quam infans: dixit, inquam omnes peccavisse in Adamo. At, si peccaverunt Infantes in Adamo: Ergo multo magis ad ejus transgressionis similitudinem. Censetur enim quasi in eadem Adami transgressionem impigisse, qui in transgressionem Adami peccavit. Imo quotquot fuerunt adulti ut infantes, insiti à cunis ipsis in Adamo, & in radice transgressionis Adamica: per hanc suam insitionem participes facti fuerunt radicis, id est ipsius transgressionis. Ergo multo magis participes similitudinis ejus.

Potuit rursus peccari ad similitudinem transgressionis Adami, vel similitudine spiritali, vel similitudine naturali. Similitudine spiritali, qua imputatio est: qua spiritu & mente concipitur idem quis peccavisse quod alius peccavit. Similitudine naturali, qua natura propagatio est: qua fortes creari fortibus, & peccatores peccatoribus generari putantur.

Similitudo porro hac naturalis, dicitur duobus modis. Primo sumitur pro imagine. Imo idem sunt similitudo & imago, Genes. i. Faciamus hominem ad imaginem & similitudinem nostram. Atque ea significatione, Infantes referre patres suos, & similes patribus suis dicuntur. Hinc illa sunt apud Iureconsultos, representationum sive imaginum jura, concessa infantibus ut adultis: imo nondum natis, ventres in possessionem missi. Sed de his satis. Sufficiat hic reposuisse, quod scriptum est Genesios 5. Adamum genuisse filium Sethum, ad imaginem & similitudinem suam, ut ad rem, & expressim significans similitudinem illam, qua est inter Infantes filios, & adultos patres qui illos genuerunt.

Si-

Similitudo naturalis, secundo modo accepta, dicitur comparatio, siue proportio. Simile est, quid comparativum, quid proportionale.

Sic canibus catulos similes, sic matribus hædos
Noram: sic parvis componere magna solebam.

Secundum hanc significationem, similes figura definiuntur à Geometris; qua circum angulos aequales latera habent proportionalia. Vnde filios Infantes, similes patribus suis adultis, ita definire possumus: Qui circum eandem & aequalem formam hominis, functiones habent corporis & animi proportionales. Eadem quippe est & aequalis forma hominis in infantibus, qua est in adultis. Functiones autem corporis & animi, si non sunt eadem & aequales in Infantibus, qua sunt in adultis; deprehenduntur certe comparata, & proportionales cum adultis.

CAPUT VII.

Infantes peccavisse ad transgressionis Adami similitudinem, secundum superiores omnes acceptiones similitudinis.

Certum est, Infantes peccavisse ad similitudinem transgressionis Adami, similitudine illa spiritali, qua intelligitur transgressio Adami imputata omnibus hominibus, infantibus ut adultis: nec non finguntur omnes homines idem peccavisse quod Adamus peccavit; ratione similitudinis qua imputatione peccati Adami exprimitur. Neque enim exortes fuerunt imputationis illius infantes; quia enim transgressionis Adamica non imago puri quam adulti.

Probatur autem Infantes peccavisse ad eandem transgressionis similitudinem, similitudine naturali; secundum utramque acceptionem similitudinis ipsius naturalis. Probatur inquam exemplo eodem quod proposui Sethi Infantis, quem Adamus genuit ad imaginem & similitudinem suam. Id est, quem genuit ad imaginem organorum & functionum omnium corporis & animi, qua fuerunt in Adamo adulto. Habuit ergo Sethus infans intellectum ad imaginem intellectus qui fuit in Adamo adul-

to. Habuit rationem ad imaginem rationis qua fuit in Adamo adulto : habuit voluntatem ad imaginem voluntatis qua fuit in Adamo adulto ; peccatricem scilicet , & propensam ad peccatum. Ergo intellexit Sethus infans ad imaginem intellectus Adami adulti. Ergo ratiocinatus est Sethus infans ad imaginem rationis qua erat in Adamo adulto. Ergo voluit & peccavit Sethus infans, ad imaginem voluntatis & peccati , sive transgressionis Adami adulti. Atqui imago, ut dixi, eadem est qua similitudo. Peccavit ergo Sethus infans , ad similitudinem transgressionis Adami adulti.

Hac autem similitudo qualis sit, clarius dignoscetur per alteram similitudinis acceptionem, quatenus est proportio : Qua nempe Sethus infans genitus est ad similitudinem Adami adulti. Id est, proportionalis cum Adamo adulto ; si ratio habeatur eadem totius infantis ad totum adultum, qua partium illius infantis ad partes istius adulti. Habuit ergo Sethus omnia organa corporis similia & proportionalia ; functiones omnes animi similes & proportionales, cum organis omnibus & functionibus omnibus, corporis & animi, qua fuerunt in Adamo adulto. Intellexit ergo Sethus infans ad similitudinem intellectus Adami adulti: Id est, secundum illam proportionem qua est inter infantem & adultum : inter intellectum infantis qui vagit, & intellectum qui viget in adulto. Ergo ratiocinatus est Sethus infans ad similitudinem, rationis qua erat in Adamo adulto ! Id est , secundum illam proportionem qua est inter rationem infantis balbutientis , & rationem qua regnat in adulto. Ergo voluit & peccavit Sethus infans, ad similitudinem voluntatis & peccati , sive transgressionis Adami adulti : Id est , secundum illam proportionem qua est inter voluntatem teneram, & peccatum infantis nondum renati ; voluntatem nodis & cortice duratam, & peccatum robustum quod est & luxuriat in adultu.

Quibus omnibus colligitur , peccatum procedere eadem similitudine & proportione , qua progrediuntur corpora, qua evadunt organa & functiones omnes corporis & animi , ab infantia ad adultam aetatem. Patet inquam infantes dici proprie peccare ad similitudinem transgressionis

nis adultorum, secundum illam similitudinem, siue proportionem peccati, non secundum actum ipsum peccati. Quem scilicet actum non possunt infantes: & quem si possent, iam non peccarent ad similitudinem, sed ad veritatem ipsam transgressionis adultorum, Peccavisse ergo censendum est infantes ad similitudinem siue proportionem illam transgressionis Adami adulti. Demonstrabitur autem inferius nullam dari similitudinem peccatorum actualium, secundum illam acceptionem qua similitudo intelligi hic debuit.

CAPUT VIII.

Anxietas Interpretum in explicacione horum verbum. Statuere primos homines creatos ante Adamum, neque officere doctrinæ Christianæ, neque historię Geneseos: imo utramque elucidare. Congruere omnino cum historiis & monumentis Gentium.

NEquè vero mirum prorsus mihi videtur, quod Interpretes Versus illos Apostoli tractantes, feliciter minus elucidaverint. Angebantur enim undique in explicacione hujus loci, usque ad Legem. Vel enim Lex illa intelligenda erat de lege data Mosi, vel de lege data Adamo. Si lex illa intelligebatur de lege data Mosi: asserendum erat, peccatum fuisse in mundo ante Mosem & usque ad Mosem; peccatum vero per illud tempus non fuisse imputatum. Si lex illa intelligebatur de lege data Adamo: statuendum erat, peccatum fuisse in mundo ante Adamum, & usque ad Adamum: peccatum vero ante Adamum non fuisse imputatum. Ponendi ergo erant alii homines ante Adamum, qui quidem peccavissent, sed qui non occavissent imputative; quia ante legem peccata non imputabantur. Inter utrumque incommodum positi Interpretes, dubitabant, neque plane sciebant quo se verterent. Quia vero minus grave apparebat asserere, peccata non fuisse imputata ante Mosem & usque ad Mosem; quam statuere alios homines fuisse vel creatos vel genitos ante Adamum: posthabuerunt illi secundum incommodum pri-

primo. Rejecerunt Interpretes fabulosos illos homines, qui Adamum pracesisse credendi erant: & sibi alios acciverunt qui non peccavissent imputative ante Moſem.

Verum, ſi licet per Dominos & Magiſtros meos, Doctores orthodoxos; penes quos jus eſt ſummum inquirendi & ſtatuendi de Theologico, & quorum judicio, me, meaque omnia, obſequenti & caca religione devoveo: experiarum faciliſſimè accommodetur hiſ verſibus explicatio, ſi dicimus, illud uſque ad Legem, intelligendum eſſe de Lege data Adamo.

Non inſicior, quin primo obtutu ſtatuerè primos homines ante Adamum conditos, præter communem Theologorum omnium ſententiam, conturbare videatur conſcientias, non in tranquillo illas collocare. Exhorreſcent ſcilicet & refugient, non dicam dictu, ſed cogitatu, quotquot ſunt religioſe vetuſtati addiſti. Neque ruruſ illud me latuit, quam male multatus fuerit ille apud veteres, qui demonſtrabat, homines eſſe Antipodas, & hemiſphæria ad diametros noſtri Orbis oppoſita. Metuendum nempe mihi fuiſſet temporibus illis antiquis & regidus; neque feliciter mihi ceſſiſſet nova tempora cogitanti, quam infeliciter ceſſerat novo illi Coſmographo; novus Mundos indaganti. At certe, nunc non eſt ut olim fuit. Melioribus natus ſeculis & auſpiciis, Deum veneror ut talem avertat invidiam: & tam benigne accipiantur quæ cogitavi ſuper hiſ, quam ſincere, & ingenuè, & exercitationis cauſa hic à me exhibentur.

Primum ergo, & præſcine dicam: eo me lubentius animum appuliſſe ad inveſtigandos alios homines ante Adamum creatos; quod putavi nullum hinc poſſe oriri incommodum fidei quæ eſt ex Euangelio. Idem enim fore concepti fatum poſitionis hujus apud Theologos, quale eſt celeberrima quaſtionis de motu terræ apud Aſtronomos. Sive enim cælos credimus circumagi, ſive terram exiſtimamus ſubverti; ſuccedunt nihilo minus vice perpetua, & dies nocti, & diei nox: revoluntur itidem ſtatim & præſcriptis temporibus, tempeſtates quaque anni: ſegetes florent vere, qua æſtate matura fiunt; ſpumant vina autumno, qua hieme defacantur. Pari eventu, ſive credimus Adamum fuiſſe

fuisse creatum solum, & primum omnium hominum; si ve ponimus alios homines ante Adamum fuisse genitos: stabit semper suo loco, & suis mysteriis religio omnis Christiana. Summa enim & fundamentum redemptionis nostra, qua Religio Christiana est, in eo consistit; ut credamus homines omnes damnatos in Adamo, innocentes probatos in Christo. Quemadmodum autem non necesse erat, Iesum Christum fuisse ultimum omnium hominum, qui aulae Mundi tolleret, ut Mundum & homines omnes absolveret: ita neque necesse erat Adamum fuisse primum omnium hominum, qui Mundi proscenia iniret, ut Mundum & omnes homines condemnaret. Manent ergo suis locis, primus Adamus & secundus Adamus: remanet semper inter Adamum & Christum, typus ille sanctus circa quem redemptio nostra, & doctrina omnis Christiana recipiuntur; et si dicimus primos homines fuisse creatos ante Adamum.

Imo certe, ut perfectior constituatur antitypus inter Adamum & Christum; commodius multo erit asserere, Adamum non fuisse primum omnium hominum, qua ratione Christus non fuit ultimus omnium hominum. Commodius inquam erit asserere, imputationem ex peccato Adami (secundum quam culpa Adamica rei facti sumus) retroactam fuisse in illos homines qui Adamum praeceperunt; qua ratione imputatio absolutionis qua est in Christo (secundum quam labe peccati Adamici diluimur), retroacta est in illos homines qui Christum praeceperunt. Minus ergo perfecte constitueretur Adamus Antitypus Christi, si poneretur primus omnium hominum: neque eadem converteretur reciprocatio imputationis ex peccato Adami, cum imputatione absolutionis in Christo; nisi retroageretur peccatum Adami in primavos homines ante Adamum, quemadmodum retroacta est absolutio Christi de peccato illo in primavos homines ante Christum.

Opinione, ut saepe fit, & vulgato magis consensu, quam exquisita veritate credi videtur, Adamum fuisse primum omnium hominum qui in luminis oras prodierunt. Illud enim neque dicunt usquam, neque intelligunt sacra & canonica pagina. Imo e contra, colligitur ex iisdem, quod

quod probare in promptu erit; alios homines Adamum antecessisse.

Adde, quod expositione hac, qua statuit primos homines ante Adamum creatos, clarior multo apparet historia Geneseos. Conciliatur eadem cum se ipsa. Conciliatur item miru modis cum monumentis omnibus profanis, siue antiquis siue recentioribus; Caldaei puta, Aegyptii, Scythi, & Sinensibus. Conciliatur vetustissima rerum creatio, qua exponitur capite primo Geneseos, cum hominibus Mexicanis, quos non ita diu Columbus penetravit. Conciliatur eadem cum hominibus illis Australibus & Septentrionalibus, qui nondum cogniti sunt. Quos omnes, sicut & illos prima & vetustissima creationis rerum, qua enarratur cap. I. Geneseos; probabile est creatos fuisse cum terra ipsa in terris omnibus, neque ab Adamo propagatos.

Per hanc rursus positionem, conciliatur fides cum recta ratione, qua non patitur ut statuamus Mundum natum hu in initio, à quibus, secundum Hesiodi computum, vix dimidia corvi unius aetas confecta est. Conciliantur demum hoc posito, qua videntur contraria versibus his Apostoli, de peccato originis, in quo recumbit doctrina omnis Christiana, quod est maxime instituti nostri. Differam in aliud tempus probationes illas, qua pro hac hypothesis peti possunt, tum ex historia Geneseos, tum ex historiis Gentium, tum & nuper è lustratis terrarum populis. Quod vero instat, peragam, & totus insistam Versibus his Apostoli, quos hinc explicare incipiam.

CAPUT IX.

Textus Apostoli. Analysis versus duodecimi. De imputatione peccati, & de regno mortis.

Versus XII. Sicut per unum hominem peccatum intravit in Mundum, & per peccatum mors: ita etiam in omnes homines mors pervasit, in quo omnes peccaverunt.

XIII. Nam usque ad legem peccatum erat in Mundo. Peccatum vero non imputabatur, non existentē lege.

XIV. Re-

XIV. Regnavit autem mors ab Adamo usque ad Moysen : In eos etiam qui non peccaverant ad similitudinem transgressionis Adami.

HI VERSUS explicari mihi videntur commodissime hoc modo.

Sicut per unum hominem. *Per Adamum qui transgressus est legem Dei : sive per transgressionem legum quam Adamus violavit.*

Peccatum intravit in mundum. *Ortum & natum est peccatum, originem accepit ; sive quod idem est, intravit in mundum, à transgressionem legum quam Deus dederat Adamo. Peccavit enim Adamus ex quo violavit interdiktam arborem, & ex quo transgressus est legem quam Deus illi dederat.*

Et per peccatum mors. *Intravit mors in mundum per peccatum, qua ratione peccatum intravit in mundum, per violatam legem ab uno illo homine Adamo.*

Ita etiam mors in omnes homines pervasit, in quo omnes peccaverunt. *Pervasit mors in omnes homines, per eundem hominem per quem omnes peccaverunt. Qua vero proxime dixerat Apostolus, Intravit peccatum in mundum, & per peccatum mors : erant satis ad demonstrandum introitum peccati & mortis in mundum; ad demonstrandam item relationem qua est inter peccatum & mortem ; ut posito peccato, mors necessario poneretur & sequeretur. Verum, ut plenius significaret introitum illum, & totam relationem adimpleret, convertere voluit propositionem Apostolus : ut quemadmodum posito peccato, ponitur & sequitur mors ; ita etiam reciproce, posita morte inferretur necessario peccatum.*

CAPUT X.

Analysis versus decimi-tertii. Legem hic intelligendam, datam Adamo. Afferitur vulgata lectio.

Sequitur versus XIII. Nam usque ad legem peccatum erat in mundo. *Vsque ad legem : intellige legem Dei datam uni illi homini Adamo : per ea quae jam dicta sunt, & quae dicentur inferius. Vsque ad legem*

legem inquam illam, peccatum erat in mundo. Adde vero, vel subaudi: Et per peccatum, mors etiam erat in mundo. Voluit scilicet Apostolus, peccatum & mortem fuisse in mundo, usque ad legem Dei; siue usque ad transgressionem legis illius divina, quam unus homo ille Adamus violavit: Nullum jus tamen habuisse in mundo, ut illius dominium & possessionem invaderent, & in illo tyrannidem occuparent. Rationem reddidit hanc: quia Peccatum non imputabatur non existente lege. Quod idem est atque si dixisset Apostolus: Ante legem Dei, siue usque ad legem illam Dei quam violavit homo ille Adamus, peccatum & mors erant in mundo: nullum jus tamen in eo usurpaverant, nulla eis erat in possessione mundi legitima collocatio, nullum ejus legitimum dominium. Ratio est, quia ante illud tempus lex nulla data erat à Deo, Lex enim Dei sola illa fuit, cujus transgressio peccati imputationem effecit, & mortis regnum constituit: qua reatum induxit peccato, & mortem instituit pœnam istius reatus: qua peccatum fecit imputatum, mortem ulciscentem & regnantem.

Legendum vero est hoc loco: Peccatum non imputabatur; quamvis recentiores versiones habeant, Peccatum non imputatur. *Vetus enim & vulgata versio legis expressim, Imputabatur. Et verisimiliter oportuit veteres Græcos codices ita conceptos fuisse, Ἀμαρτία δὲ ἐκ ἔλλογιτο μὴ ὄντι νόμῳ.* Incuria vero Notariorum, qui primum pedem littera μ, ad verbis μὴ, continua serie scripserant cum verbo ἔλλογιτο: reliquum vero littera ejusdem μ, longiuscule, & disjunctum à primo pede: accidisse ut ἔλλογιτος primum corruptius, deinde ἔλλογιτου repositum fuerit: quamvis vere scribendum fuisset ἔλλογιτο: quod postulat brevior & genuina magis hujus loci sententia.

Virumque certe ut idem significans, potuit legi impune; & utrumque semper erit hoc loco subaudiendum, siue ἔλλογιτου siue ἔλλογιτο scribatur. Posito uno alterum consequetur. Scribatur enim primo; Imputatur. Posita hac præmissa: Peccatum non imputatur non existente lege: elicienda semper erit hæc conclusio. Ergo ante legem,

gem, vel usque ad legem, peccatum non imputabatur. Scribatur rursus, Imputabatur: ut fiat hic sensus: Ante legem, vel usque ad legem, peccatum erat in mundo; sed peccatum tunc temporis non imputabatur. Ratio erit subaudienda, quam suppressit Apostolus, orator elegans: Quia peccatum non imputatur non existente lege. Verius ergo, ut brevius & elegantius, legendum est hoc loco, Imputabatur, non Imputatur.

CAPUT XI.

Analysis versus decimi quarti. De regno mortis ab Adamo usque ad Mosem. Mosem hic sumi pro lege data Moysi.

Addit Apostolus versu decimo quarto. Sed regnavit mors ab Adamo, usque ad Mosem. Regnavit mors: per imputationem peccati. Regnare incepit mors per imputationem peccati: qua ratione imputari capit peccatum, per transgressionem legis Dei. Ante legem Dei, & antequam Adamus temerasset legem Dei; peccatum erat in mundo, sed non imputabatur. Ante Adamum, & ante legem Dei, mors erat in mundo, sed non regnabat. Superiori versu, & hoc, ut patet, promiscue sumuntur, & idem sunt quoad tempus, lex & Adamus. Lex enim Dei data fuit primum, & primo omnium hominum Adamo: & mors regnavit ab Adamo, ratione illa tantum qua lex Dei violata est ab Adamo.

Usque ad Mosem. Regnavit mors ab Adamo: id est, à momento illo quo Adamus transgressus est legem Dei: usque ad Mosem: id est usque ad legem Dei datam Moysi; & quamdiu lex illa Dei data Moysi viguit. Moses enim sumitur hoc loci, pro lege data Moysi: quemadmodum sumptus est Adamus, pro lege data Adamo. Ita quando in divinis scriptis, Deus vocat populum suum Iudaicum, filium suum Jacob, sive Israël: intelligit Deus Iudaos, non filios carnis, sed filios promissionis. Et Iacob sumitur locis illis, pro promissionibus quas Deus fecerat patribus Iudaorum. Ita passim apud humaniores auctores, Decem viri sumuntur pro legibus duodecim tabularum. Sic in iure
vult.

vulgare est, Ait prator. Ubi prator sumitur pro legibus remissioris jura, quas Pratores olim eduxerant. Pari ratione Moses, est lex Mosaica. Voluit autem Apostolus, mortem regnavisse ab Adamo, sive à lege Adamica; usque ad Mosem, sive usque ad legem Mosaicam. Imo quamdiu lex Mosaica obtinuit. Vel clarius, usque ad adventum Domini nostri Iesu Christi: cujus mors utriusque legi fuit consummatio, & data Adamo, & data Mosi.

Lex data Adamo, tanquam generalissima, & prima legum divinarum, indicta omni generi humano; illa fuit, cujus transgressione peccatum, & per peccatum mors, intraverunt in mundum, & pervaserunt in omnes homines: qua peccatum imputari, mors regnare cœpit in omnes homines. Lex data Mosi, appendix fuit legis illius generalissima, ad particularem usum Iudaorum. Christus autem moriens sustulit imputationem peccati, à violata prima illa lege in mundum inveltam; & legem Mosi, quam Iudæus & ipse Christus observaverat, antiquavit. Qua ratione vero, sublata causa tollitur effectum, eadem Christus legi in genere obtemperans, & morte sua transgressionem legi expians; tollens imputationem peccati qua erat per transgressionem legis, sustulit regnum mortis quod erat per illam peccati imputationem. Ita ut à morte Christi tantum desierit regnum illud mortis, quod inceperat à peccato Adami.

CAPUT XII.

Duo tempora notari ab Apostolo. Vnum, à lege. Alterum, ante legem. Sive quod idem est. Vnum, ab Adamo. Alterum, ante Adamum.

PAtet ex prædictis, Apostolum posuisse hoc loci duo tempora. Unum, quo peccatum & mors primitus intraverunt in mundum, & pervaserunt in omnes homines: quo peccatum primitus imputari, mors regnare cœpit. Alterum, quo quidem peccatum & mors erant in mundo, sed non imputabantur, non regnabant: nullo jure pervaserant in omnes homines; non vi-

vebant. Peccatum tunc temporis erat mortuum: mors erat mortua: & nullus erat sepulchri aculeus.

Tempus primum exprimitur his verbis. Per unum hominem peccatum intravit in mundum. Mors in illo pervasit in omnes homines. Item; Regnavit mors ab Adamo. Tempus secundum notatur per hac verba. Usque ad legem peccatum erat in mundo: peccatum vero non imputabatur non existente lege. Atque adeo non imputato peccato, non regnabat mors.

Tempus autem illud primum, quo peccatum primitus imputari, mors regnare cœpit; fuisse illud quod incepit ab Adamo, à lege, & transgressione legis illius quam Adamus violavit, sive à peccato Adami; patet ex verbis ipsis Apostoli, & luce meridiana clarius patet. Peccatum enim Adami illud, fuit omnium peccatorum, ut ita dicam, imputatissimum: imputatum omni generi humano. Peccatum illud, primum omnium vixit: & recte dictum est originale; quia primum omnium intravit in mundum per Adamum. Verba illa, intravit in mundum; quasi nascens peccatum, & Adamum quasi perturbentem significant. Sed quo inficiantem jugules: Imputatum fuit peccatum ab Adamo, quia regnavit mors ab Adamo. Peccatum Adami illud primum omnium regnavit; quia mortem intenter omnibus hominibus. Ius gladii & mortis inferenda, summa est animadversionis, & nota meri imperii. Huc de causa usus est Apostolus verbo hoc, regnavit; ubi dixi, Regnavit mors ab Adamo. Et significavit, peccatum & mortem imputari cœpisse, vixisse, & regnavisse ab Adamo, sive à momento illo quo Adamus legem Dei pratergressus est.

Iam vero investigemus tempus illud, quo peccatum, & mors erant in mundo; sed non imputabantur, non vivebant, non regnabant. Certe, quarendum illud erit ante legem: quod voluit Apostolus verbis conceptissimis. Usque ad legem peccatum erat in mundo: peccatum vero non imputabatur non existente lege. Usque ad legem: intellige legem Dei datam Adamo: qua lex Mundi, & Lex, simpliciter & sola dici potuit: utpote per cujus transgressionem solam peccatum potuit imputari & mors regnare

regiare toti mundo. Nequaquam vero intelligenda hic est lex data Moſi. Ut enim ſupra & fuſe demonſtratum eſt, imputabatur peccatum ante legem datam Moſi; & ex imputatione peccati, regnabat mors ante illam.

Quarendi ergo erunt alii homines ante Adamum, non ante Moſem; quorum neque peccata fuiſſent imputata; neque mors regnans: cum ab Adamo, non à Moſe, imputari peccatum, mors regnare cœperit.

CAPUT XIII.

Creati homines ante Adamum non peccaverant ad ſimilitudinem transgreſſionis Adami. Legendum hic, peccaverant, non peccaverunt.

Adjuvat inveſtigationem hanc quod proxime ſequitur. Regnavit mors ab Adamo, &c. In eos etiam qui non peccaverant ad transgreſſionis Adami ſimilitudinem. Notanda vero ſunt curioſe verba illa: In eos etiam qui non peccaverant. ὅτι τῆς μὴ ἀμαρτησίᾳς. τὸ ἀμαρτησίᾳς, τὸ peccaverant; denotat tempus præcedens, Græcè ἀόριστον, Latiniſe indeterminatum: præcedens inquam definitum illud tempus ab Adamo, à quo peccatum intravit in mundum. Denotat homines qui peccaverant ante Adamum, ſed non ad transgreſſionis Adami ſimilitudinem. Peccaverant quidem primi illi homines ante Adamum conditi, ſed nullius in legem Dei admiſſa fraudis rei erant: ad ſimilitudinem Adami, qui primam fraudem legi Dei fecit. Nulla enim erat promulgata lex Dei ante Adamum: atque adeo non exiſtente lege Dei, nullum erat illorum hominum peccatum; quia non erat imputatum, quale fuit peccatum Adami.

Vulgata verſio legit hoc loco, Peccaverunt, non Peccaverant. Vi fieret vulgatus ille ſenſus: mortem regnaviſſe ab Adamo in Adami poſteros; qui in illo, & ab illo, peccaverunt: ſive peccaviſſent ad transgreſſionis Adami ſimilitudinem, ſive non peccaviſſent ad illam ſimilitudinem. Quod ſi ita eſſet, nihil hic novi portaviſſet Apoſtolus. Quis enim neſcit mortem regnaviſſe ab Adamo, in omnes Adami poſteros qui in illo peccaverunt?

Verum inquit interpretes : nihil hic vulgare vel jejunum attulit Apostolus ; quando dixit mortem regnavisse ab Adamo , usque ad Mosem , etiam in eos qui non peccaverunt ad transgressionis Adami similitudinem. Quippe qui intellexerit mortem regnavisse in Infantibus , qui non peccaverunt ad transgressionis Adami similitudinem ; quia non peccaverunt actualiter , quemadmodum Adamus peccavit.

Refutavi hæc pluribus supra : & nullam hic crambem recquere in animo est. Sed ne in illis deinceps vel minimus supersit scrupus , probandum est : Peccavisse actualiter qua Adamus peccavit , non fuisse peccare ad hanc peccati sive transgressionis Adami similitudinem , de qua hic egit Apostolus. Evincendum insuper & hoc : Infantibus Adami posteros , peccavisse actualiter ad hanc veram transgressionis Adami similitudinem.

C A P U T XIV.

Peccatum dari materiale & formale : non imputatum & imputatum. Similitudinem transgressionis Adami positam in imputatione, non actu , transgressionis ejus.

Utrumque autem brevi methodo absolvam , si licet uti verbis Scholæ , distinguendo peccatum in materiale & formale. Peccatum materiale voco illud , quod manat à natura nostra , à materia , à carne , & sensibus nostris. Peccatum formale illud , quod manavit à lege , cujus transgressionem peccatum formam imputationis accepit.

Latini nomen peccati mutuati sunt à pecore. Quoties enim homo delirat à recta ratione illa qua hominem constituit ; quoties impulsu materia sua quam habet communem cum brutis , quid agit dignum pecore & indignum homine ; toties cadere videtur à specie sua , & incidere in speciem pecoris sive bruti. Quicquid enim fit ab homine , vel incuria numinis , vel ira , vel libidine , vel aliquo alio appetitu ; commune ei est cum pecudibus quas natura finxit ad terram pronas , neque ad cælum conversas. Com-

munis

munis est homini cum brutis, rapacitas, sitis effera sanguinis; communes incesta nuptia, libidinosa illa nefandarum venerum prurigines, & cetera de genere hoc, quae leges Gentium naturali suo illo recta rationu ductu coëruerunt: caverunt scilicet, ut quae possent homines, starent in suo gradu, in sua specie, nec declinarent in bruta.

Deus autem quid egerat sublimius cum homine. Voluerat ut homo qui pronis sensibus, & inclinante materia vergebat in brutum; vi spiritus & forma sua elevaretur in Deum: ut essentia quodammodo, sicut imaginis divina, fieret particeps. Legem ergo illi dederat qua id posset, si eam observaret: & ei imputaretur si violando legem illam, non ascenderet ad sublimem illum statum, & ad gradum illum gloriae quem Deus illi adornaverat. Ex quo igitur legem illam transgressus est Adamus, eo nomine quo gerebat personam totius generis humani: peccatum quod per se & materialiter, absque lege Dei, non imputabatur, à lege Dei, vel à transgressione legis illius, coëpit formaliter imputari. Peccatum quod erat peccans simpliciter & materialiter ante legem, factum fuit peccans *neg' i' eo p' Colu*, ut loquitur Apostolus, capite 7. hujus epistola, vers. 13. forma superveniente, vel adventu legis; siue per imputationem violatae legis. Et hoc est verum peccatum formale quod peccavit Adamus, quod peccaverunt omnes homines in Adamo. Unde manifestò constat, potuisse ante Adamum peccari actualiter quoad materiam, quemadmodum Adamus peccavit: non autem quoad formam & imputationem peccati: quae est vera similitudo transgressionis Adami, de qua hic agitur. Ratio est, quia ante legem non imputabatur peccatum. Vbi non est lex, inquit Apostolus capit. 4. hujus epistola, neque pravariatio est. Pravariatio autem eadem est, quae transgressio legis: illa ipsa proprie quae peccatum imputationis labe infecit.

Quod ut compingatur in oculos: pecudes actualiter & materialiter eadem faciunt, quae transgrediuntur homines; incestant, rapiunt, occidunt: nec erit tamen usquam adeo supinus qui dicat, pecudes peccare ad similitudinem trans-

transgressionū hominum : quia pecudes quæ hæc peccant , sequuntur tantum suam naturam , & suam materiam ; neque legem transgrediuntur ullam , quia nulla eis data est cujus transgressione formetur in eis & imputetur peccatum. Peccavisse igitur actualiter quemadmodum Adamus peccavit , non fuit peccavisse ad similitudinem illam transgressionis Adami , de qua hic loquitur Apostolus .

Hinc probare erit facile , Infantes peccavisse actualiter , ut ita dicam , ad illam similitudinem . Nam si non peccaverunt infantes ut adulti peccant , quoad materiam , quia non habent actu aque vegetam ; peccaverunt certe aque actualiter quoad formam , & quoad imputationem peccati . Actualiter enim imputatum fuit peccatum Adami infantibus ut adultis ; & actualiter mortui sunt infantes ut adulti , propter illud peccatum Adami , quod eis imputatum fuit . Quæ est vera similitudo transgressionis Adami , de qua hic agitur . Peccavisse igitur Infantes actualiter censendum est , ad transgressionis Adami similitudinem illam quam intellexit hoc loco Apostolus .

C A P U T XV.

Quæ sit vera similitudo transgressionis Adami , per Oseam Prophetam .

SEd omiſſis diſtinctionibus Logicis ; videamus manifeſtiſſime qua fuerit ſimilitudo illa peccati Adamiſſi , per Oſeam Prophetam , capite 6 verſu 7 . Qui locus unicus occurrit in bibliis ſacris , ubi explicatur præciſe & lucide , quid fuerit peccare ad ſimilitudinem peccati ſive transgressionis Adami .

Objurgans Deus eo loci Iudaos , quod rupiſſent pactum ejus , ſive quod egreſſi eſſent legem quam dederat Moſi Dominus , hæc ait . Ipsi autem ſicut Adam transgreſſi ſunt pactum meum . Quod idem eſt atque ſi dixiſſet Deus ; Peccaverunt Iudæi ſicut Adamus peccavit : vel quod perinde eſt , peccaverunt Iudæi ad ſimilitudinem transgreſſionis Adami . Quare ? Quia transgreſſi ſunt Iudæi pactum meum , ſive legem meam ; ſicut , vel eadem ſimilitudine , qua transgreſſus eſt Adamus pactum meum , ſive legem

gem meam. Quia transgressi sunt Iudaei pactum meum, quod in Mose cum Iudaeis pepigeram; sive legem meam quam dederam Iudaeis in Mose: sicut, vel eadem similitudine, qua transgressus est Adamus pactum meum, quod in Adamo cum omnibus hominibus pepigeram; sive legem meam quam dederam omnibus hominibus in Adamo.

Patet hinc perspicue, longe ante Mos. in pactum Dei fuisse conventum cum Adamo; sive legem Dei primam indictam fuisse Adamo. Quod pactum, sive quam legem Dei, primus omnium hominum rescindens & everrens Adamus; quicumque homines transgressi sunt alia pacta; sive alias leges Dei: dicti sunt homines illi peccavisse sicut Adamus peccavit: vel quod idem est, dicti sunt peccavisse ad similitudinem transgressionis Adami.

Concluditur hinc tandem: peccavisse ad similitudinem transgressionis Adami; fuisse, transgredi pactum, transgredi legem Dei; sicut Adam transgressus est pactum, transgressus est legem Dei. Ergo non peccavisse ad similitudinem transgressionis Adami, fuisse, nullum pactum Dei rupisse, nullam Dei legem perfragisse: quales illi homines non peccaverant ad similitudinem transgressionis Adami, de quibus hoc loco D. Paulus: quibuscum Deus nihil pepigerat: quibus nullam legem Deus indixerat: qui peccaverant ante legem Dei: qui nullo jure; qui nullo pacto divino tenebantur: qui non peccaverant imputative, quia ante legem peccata non imputabantur. Ante legem inquam illam quam Deus dedit Adamo: à quo peccatum capit imputari, quia lex ab illo capit esse.

CAPUT XVI.

Neminem potuisse unquam peccare actualiter sicut Adam peccavit. Infantes verius peccavisse ad similitudinem transgressionis Adami quam adultos. Legem Mosaicam expressam ad similitudinem legis Adamicæ. Legem Adamicam hoc loco intelligendam,

*Nota*nda porro sunt ex hoc loco Osee Propheta. Primum. Neminem unquam mortalium, vel adul-

tum, potuisse, proprie loquendo, peccare actualiter sicut Adam peccavit. Ratio in promptu est: quia arbor scientiæ boni & mali evanuit ex oculis omnium hominum, ex quo Adamus Paradiso eiectus est. Ita ut impossibile fuerit ulli unquam mortalium vel adulto, carpere fructum illum vetitum quem Adamus comedit. Atqui, non alia ratione credendi sunt homines peccavisse in Adamo quam illa, qua censentur omnes comedisse fructum illum vetitum quem Adamus comedit. Ergo si non credendi sunt comedisse fructum illum vetitum actualiter, sicut Adamus illum comedit; neque censendi sunt peccavisse actualiter sicut Adamus peccavit. Restat igitur ut credantur omnes homines qui peccaverunt in Adamo, peccavisse ad similitudinem peccati Adamici. Credantur inquam Gentiles, quibus lex Dei nunquam innotuit, peccavisse per imputationem istius peccati; qua censentur peccavisse, non actu, sed similitudine manducati fructus prohibiti, & violata legis ab Adamo. Credantur porro Iudæi quibus lex Dei nota fuit; peccavisse secundum eandem similitudinem, dupliciter: Primo, quatenus transgressio Adamici imputata eis fuit, aequæ ut Gentilibus: Secundo, quatenus & ipsi transgressi sunt legem Dei quam noverunt; sicut Adamus pater eorum primus, transgressus est legem Dei quam & ipse noverat. Et hoc est proprie quod voluit Oseas hoc loco, Iudæos peccavisse sicut Adamus pater eorum primus peccaverat.

Labitur hinc rursus in cineres quod ad hunc locum D. Pauli attulerunt Interpretes, ubi voluerunt adultos peccavisse ad similitudinem transgressionis Adamici, quia peccaverant actualiter quemadmodum Adamus peccaverat. Ex eo enim quo censentur adulti peccavisse actu peccatum Adamici, non amplius censeripotuerunt peccavisse ad similitudinem peccati illius: quia plus est peccare actu, quam ad similitudinem; ratione illa, qua actus qui est veritas rei, plus est quam similitudo que est imago rei. Imo infantes verius censendi essent, secundum Interpretes, peccavisse ad similitudinem peccati Adamici, quam adulti. Certissimum enim est infantes peccavisse in Adamo. At nullo alio pacto potuit quis peccare in Adamo; quam
vel

vel actu, quo peccavit Adamus, & peccaverunt adulti secundum Interpretes; vel ad similitudinem istius peccati. Atqui infantes non peccaverunt actu peccatum Adami, secundum Interpretes. Peccaverint ergo necesse est, secundum Interpretes, ad peccati illius similitudinem.

Notandum insuper est, eandem esse rationem legis ad legem, qua peccati ad peccatum quod manavit à transgressione sua legis. Ac proinde, si peccatum Iudaorum est similitudo peccati Adamici: consequi hinc, legem Mosaisicam, qua peccato Iudaorum causam praeiit, similitudinem fuisse legis illius qua peccatum Adami fecit. Atque adeo legem Mosaisicam, neque primariam neque originalem dicendam; sed secundariam ad similitudinem primariae & originalis Adamicae expressam.

Notandum ultimo est: legem Mosaisicam subaudiendam esse, ubi agitur de peccato Iudaorum: legem vero Adamicam intelligendam, ubi agitur de peccato illo originali quod transit in omnes homines, Iudaos & Gentiles, ex peccato Adami. Atqui egit hoc loco Apostolus de peccato illo originali. Ergo & intellexit hoc loco legem Adamicam, non Mosaisicam.

CAPUT XVII.

Peccata facta ante legem, neque imputata, neque facta ad similitudinem transgressionis Adami. Peccata facta post legem, imputata, & facta ad similitudinem transgressionis Adami. De peccato mortuo, & vivis hominibus ante legem & Adamum.

Notandum praeterea est diligentissime; nullam aliam his versibus, & toto hoc capite, sive distinctionem, sive differentiam, sive dissimilitudinem peccatorum, vel posuisse vel intellexisse Apostolum; praeter illam qua est inter peccata imputata, & peccata non imputata; inter peccata facta post legem, & peccata facta ante legem. Peccata facta post legem, imputata: peccata facta ante legem, non imputata. Peccata facta post legem datam Adamo, imputata: peccata facta ante legem datam Adamo, non imputata. Peccata imputata post legem datam

Adamo, facta ad similitudinem peccati Adamici, à quo lex cœpit esse. Homines ergo qui non peccaverant ad similitudinem peccati Adamici, eos fuisse qui peccaverant ante legem & Adamum: sed quorum peccata non imputata fuerant, quia ante legem peccata non imputabantur.

Peccata eorum erant mortua ante legem. Quod voluit Apostolus infra capite 7. hujus epistola, versu 9. Absque lege (vel ante legem, quod idem est) peccatum erat mortuum. Id est, non vivebat ante legem peccatum: nondum natum erat: nondum originem acceperat: nondum intraverat in mundum: nondum exierat in oras luminis: nondum erat dictum originale. Ergo neque factum erat ad similitudinem peccati Adamici: quia peccatum illud Adamicum factum fuit à lege data Adamo, & post legem ei datam: quia vixit peccatum ab Adamo: quia intravit in mundum per Adamum: quia originem accepit, & dictum est Originale, ab Adamo. A quo deinceps Adamo quicumque peccaverunt homines, dicti sunt peccavisse ad similitudinem peccati Adamici: peccati scilicet vivi, & originalis, quod fuit a lege, & post legem: non autem ad similitudinem peccati mortui, quod erat absque lege, & ante legem.

Ego vero vivus absque lege quondam. Subjunxit Apostolus loco eodem. Id est; Ego vero non mortuus absque lege, vel ante legem. Quemadmodum enim peccatum vocaverat mortuum, quod nondum natum erat: simili argumento vivos homines absque lege & ante legem vocavit Apostolus, qui non moriebantur propter imputationem prætergressa legi. Dixit Apostolus vivos illos homines, apud quos peccatum erat mortuum: qua ratione mortuos homines ille idem alias pronuntiavit, apud quos peccatum vixit.

Introduxit autem hoc loco D. Paulus hominem loquentem absque lege, & ante legem: constitutum haud dubie sub statu illo natura, quem diximus præcessisse statum legis. Nam de se solo locutum hic Apostolum, nec verisimile est; cum lex utraque & Adami & Mosis, fuerit longe ante illum: neque dici possit vixisse illum unquam absque lege.

In-

*Introduxit inquam hominem loquentem, quondam
 toti, indefinite, absque lege, & ante legem. Ergo ante
 Adamum, cum definite lex data fuerit Adamo.*

CAPUT XVIII.

*Introducitur vivus homo absque lege, vel ante legem
 & Adamum, loquens secundum mentem D. Pauli.*

I*ntroducamus & nos ad exemplar D. Pauli, hominem
 eundem Pra-Adamitam, homines Adamsi posteros
 affantem. Fingamusque illum bifrontem, qui antecede-
 rentia Adamum & legem viderit tempora; quique se-
 quentia Adamum & legem noverit secula. Qui viderit
 utriusque status homines: & sub statu natura creatos, &
 sub statu legis positos.*

*O vos! dicet ille, sub statu legis constituti: vos ego allo-
 quor. Attendite & videte; qua differentia fuerit inter
 me creatum ante legem, & vos à lege sive post legem pro-
 genitos. Vivebam ego quondam sub statu illo natura, qui
 à vestris presentitus, sed neque dum cognitus fuit. Vive-
 bam inquam sub statu illo, absque lege Dei. Et vivebam
 vita illa naturali tantum, qua mihi communis erat cum ce-
 teris animantibus. Vivebam absque cognitione veri illius
 Dei, qui creavit cælum & terram. Et vivebam absque
 ulla cognitione voluntatis ejus.*

*Quicquid Dei notum mihi poterat esse, manifestum mi-
 hi erat lumine illo innato, & recta ratione illa qua mihi à
 natura indita erat. ^a Invisibilia Dei illius intellecta &
 conspecta mihi erant, à creatione mundi, & per ea qua
 facta erant. Prasumebam Deum illum esse, indagine illa
 naturali qua non nisi in uno principio creatore conquiescit:
 sed Deum illum non noveram. Incognitus mihi erat tunc
 temporis Deus ille; qualis idem erat incognitus tempore
 D. Pauli Atheniensibus. ^b Deus ille qui se toti natura,
 atque adeo hominibus manifestum dederat, per potentiam
 suam, & per mirabilia creationis: absconderat à me fa-
 ciem suam, & nomen suum; nec se mihi confessus erat,
 qualem se deinceps Adamo confessus est. Homini nempe
 illi*

a Cap. i. Epist. ad Rom. b Actor. cap. 17.

illi quem ad hoc peculiariter formavit, ut se illi communicaret, & notam in illo faceret voluntatem & legem suam omnibus hominibus. Cognitio prima veri illius Dei: cognitio prima voluntatis & legis ejus, ab Adamo fuit. Quo momento notum se dedit Deus homini illi; ex eo notam fecit homini illi legem suam. Et lex Dei cœpit esse ab homine illo Adamo, cui primo omnium hominum Deus se approbavit, & quem primum allocutus est.

Peccabam ego absque lege, & ante legem illam Dei: sed non peccabam in Deum; quia nulla adhuc mihi lex Dei nota erat, qua veiisset peccatum. Remordebat me intrinsecus peccatum meum; quia me, dignitate & excellentia creationis meae, supra omnia animalia positum, infra bestias ipsas traducebat. Pudebat scilicet me peccati mei, ante legem Dei; quam non noveram, quia nondum erat: eodem modo quo pudebat Socratem & Catonem peccati sui, post legem illam Dei; sed quam neque ipsi noverunt. ^a Accusabatur & condemnabatur peccatum illud meum, natura ipsa, & me ipso iudice: quæ ratione & ipse mihi ipsi eram quodammodo lex à natura.

Imo & illud: pigebat me peccati mei quondam: quia præter legem illam naturalem, qua mecum nata erat, leges iidem alia præscripta mihi erant ante legem illam Dei, decretis hominum, jure gentium & civili. Quales deincept & post legem illam Dei, præscripta iidem leges fuerunt, Gentilibus illu quos vocatis hominibus; quibus, sicut & nobis, ante legem creati, lex eadem illa Dei fuit incognita: quales inquam leges præscripta illi fuerunt, vel à Lycurgo, vel à Solone, vel à Decemviris. Nefas quippe mihi erat peccavisse in leges illas decretis hominum & iudicum meorum mihi præscriptas: quale nefas erat vel Thracibus, vel Atheniensibus, vel Romanis, peccavisse in leges illas suas, à Legumlatoribus illi suis promulgatas.

Remordebat ergo me peccatum meum, natura ipsa & me ipso iudice. Imo coercerant peccatum illud meum Iudices ad hoc constituti, legibus illis suis gentium & civilibus. Sed peccatum illud meum mihi non imputabatur à

Deo

Deo iudice, quia Deus legislator mihi ignotus erat. Sciebam quid esset peccare in leges hominum: nesciebam quid esset peccare in legem Dei. Sciebam quid esset peccatum, hominibus illud prohibentibus: nesciebam quid esset peccatum, Deo illud prohibente. Peccabam in legem naturam, & in leges illas hominum, gentium puta & civiles, quae à natura orta erant: sed non peccabam in legem illam Dei, cuius transgressio mihi imputaretur à Deo, sicut imputata fuit Adamo: & cuius imputationis nota fuit illi & posteris ejus, mori morte: morte inquam regnante & duplici. Non idcirco quod peccabam, moriebar morte; sicut Adamus deinceps mortuus est, quando legem Dei transgressus est. Non moriebar ego ante legem illam Dei, morte illa regnante & duplici, quae secuta est transgressionem legis illius divinae, & imputationem peccati Adamici. Mors mea, ante legem illam, mihi pure & unice erat naturalis; non regnans, non imputata, non duplex, ut morte morerer. Moriebar, sed non morte moriebar.

Hac ita mecum gerebantur sub statu natura, ante legem & Adamum. Vobis autem sub statu legis constitutis; & ab Adamo, vel post Adamum genitis, res aliter longe se habuit. Peccatum enim illud quod mihi erat simpliciter & naturaliter peccatum, sub natura, ante legem & Adamum: peccatum idem illud à lege & Adamo, vobis coepit esse imputatum & duplex. Peccatum quod mihi erat mortuum, quod non originem acceperat, quod non vivebat: quod cum patrabam, vivebam: sive quod perinde est, propter quod non moriebar morte, sub natura, ante legem & Adamum: peccatum idem illud, à lege & Adamo, originem accepit, intravit in mundum, & vixit in vobis. Mors quae mihi naturaliter tantum conungebat, sub natura, ante legem, ante transgressionem legis, vel ante peccatum Adami: mors eadem illa, à lege & peccato Adami, coepit regnare in vos, & imputationis causa vobis infligi. Mors mihi erat simplex ante legem & Adamum: mors vobis fuit duplex, ex quo coepit esse regnans, à lege & Adamo, propter peccatum Adami.

Quibus omnibus, clarius patet Sole ipso cum sudum est; quid fuerit non solum peccare ad similitudinem transgressio-

gressioni Adamica: sed etiam, quid fuerit mori ad similitudinem mortis Adamica.

CAPUT XIX.

Peccatum Adami fuisse retro imputatum primis hominibus ante Adamum conditis: & damnatione in mortis ex illo peccato, retro regnavisse in illos. Qua de causa illud fieri debuerit.

Tale vero fuisse peccatum Adami dixit Apostolus hoc loco, ut retro imputatum fuerit, & mors, sive damnatio mortis, ex illa peccati imputatione in illos etiam homines retro regnaverit, qui vixerant sub statu natura, non sub statu legis: qui peccaverant ante legem, atque adeo ante Adamum.

Quod nimirum oportuerat, ratione mysterii ad salutem, non ad perniciem eorundem hominum instituti. Oportuerat enim primos illos homines, qui peccaverant impune erga Deum ante legem, quia nullius legis divina violata rei erant, reos fieri in reatu Adami, ut participes fierent salutis & gloria qua est in Christo. Oportuerat primos illos homines peccavisse in Adamo, ut sanctificarentur in Christo. Quod ut fufius eloquar. Oportuerat, ut hominibus illis, ratione & virtute mysterii, censeretur retro imputatum peccatum Adami; & censeretur mors sive damnatio mortis, ex illa imputatione peccati in illos retro regnavisse; priusquam mors Christi, qua peccati Adamici fuit expiatio, quaque gloriam salutis operatur, retro eu imputaretur: & priusquam salus qua in Christo est, quaque vita ipsa est immortalis & aterna, retro regnaret in eosdem, ex illa mortis Christi imputatione. Oportuerat ut quibus imputandus esset Iesus Christus, iisdem prius imputaretur Adamus. Ut quibus impuzanda foret mors secundi Adami, iisdem prius imputaretur peccatum primi Adami. Ac demum, qua virtute mysterii vivere eis daretur in Christo; eadem ratione imputationis, censerentur prius mortui in Adamo. De quibus verissime potuit illud usurpari; Perissent nisi perissent.

CAPUT XX.

Peccata præcedentia, de quibus locutus est. D. Paulus cap. 3. hujus epistolæ; eadem esse quæ facta ante legem & Adamum; quia legem & Adamum præcesserunt.

Peccata illa quæ præcesserunt peccatum Adami, illa eadem fuere, nisi me fallit conjectura, quæ vocavit Apostolus supra, capite 3. hujus epistola, Peccata præcedentia: προγενότα αμαρτήματα, cum ait, Deum proposuisse Iesum Christum placamentum per fidem in sanguine ipsius; ad demonstrationem justitiæ suæ, prætereundo peccata quæ præcesserunt. διὰ τὸ πᾶσι τῷ προγενότων αμαρτημάτων. Quæ præcesserunt: supple, legem. De quibus peccatis loquitur hic nostris versibus Apostolus. Edixit enim peccata fuisse ante legem. At certe, quæ peccata præcedentia sive antecedentia, intellexisset Apostolus loco illo capituli tertii, præter illa quæ legem præcesserunt sive antecesserunt? Ideo dicta commodissime Antecedentia, quia facta ante legem. Quæ scilicet peccata ab initio nullâ & irrita, quia facta ante legem & Adamum, ex postfacto Adami convaluerant: quibusque aspersa fuerat labes imputationis ex peccato Adami, quam sanguis Christi ablueret. Vel secundum mentem & verba Apostoli: quæ peccata antecedentia Iesus Christus placamentum ad hoc propositus præteriret & aboleret.

Mihi vero nihil agere videntur, qui volunt, Apostolum intellexisse hoc loco; Iesum Christum placamentum ad hoc propositum fuisse à Deo, ut præteriret peccata antecedentia legem Mosaicam. Tanquam ad hoc propositus videretur Iesus Christus, ut præteriret & deleter peccata facta in legem tantum à Mose promulgatam; ut solum extingueret legem Mosaicam, in quam Iudæi soli peccavissent: non autem ut maxime præteriret, & præcipue extingueret peccata facta in legem datam Adamo atque in primis refingeret legem illam, in quam non solum Iudæi, sed homines omnes peccavissent. Certe nulla hic res
- fuit

fuit Apostolo cum Mose : tota illi fuit cum Adamo : quare ratione Christus dicitur est ; non secundus Moses, sed secundus Adamus. Neque intellexit Mosem, vel locutus est de Mose hoc loco Apostolus, nisi quatenus Iudaorum princeps ille, in cuius legis transgressione Iudai soli peccaverunt, pependit, originem accepit, & derivatus est ab Adamo; non solum primo Iudaorum parente, sed & omnium hominum principe mystico: nimirum, in quo, vel in cuius transgressione homines omnes peccaverunt.

Patet ergo, locum illum capitis tertii, referri debuisse ad hos versus capiti quinti. Et peccata antecedentia de quibus illic egit Apostolus, eadem fuisse qua hic intellexit facta ante legem : non imputata per se illorum auctoribus, sed illis mystice retro imputata ex peccato Adami : ut Iesus Christus placamentum ad hoc propositus, prateriret peccata illa; & gremio illo suo, absolutionu & gratia, auctores illorum susciperet.

CAPUT XXI.

Quomodo censeri possit, peccatum Adami fuisse retro imputatum primis hominibus ante Adamum conditis : nec non damnationem mortis ex illo peccato, retro regnavisse in illos.

AT inquires. Quomodo censeri & cogitari potest, homines illos qui Adamum precessisse intelligendi sunt, peccavisse ad similitudinem transgressionis Adami, & mortem ex transgressione illa retro regnavisse in illos ? Satisfaciam huic quomodo, per alias quaestiones factas in quomodo. Et solverit illam qui unam harum solvet.

Quare è contra. Quomodo per transgressionem illam Adami, per peccatum illud originale, censetur & cogitatur natura omnis corrupta, & labefacta omnis creatio? Quomodo censentur & cogitantur peccavisse, non dicam Infantes, sed neque dum etiam nati homines in peccato Adami? Illud enim ; Omnes homines peccaverunt in Adamo: denotat, collefive omnes homines in specie, & speciem totam peccavisse in Adamo : homines ergo omnium
tem-

temporum & aeternum. Scripta sunt de morte; eadem qua de peccato. Mortem in Adamo pervasisse in omnes homines. Id est; mortem, ex quo Adamum perculit, pervasisse in omne genus humanum. Ergo in omnem speciem, & in homines omnium temporum. At quomodo censendi & cogitandi sunt decollati in uno hoc homine omnes homines, neque dum etiam nati? Nimirum intelligendi sunt primi illi homines ante Adamum conditi, peccavisse in Adamo, & damnationem mortis subisse in Adamo; ratione eadem qua neque dum etiam nati peccavisse in illo putantur, & mortui in illo existimantur.

Quaro itidem. Quomodo censetur & cogitatur peccatum Adami imputatum Gentilibus illis hominibus, qui nati sunt ab Adamo; si ve post Adamum? Quomodo censetur mors regnavisse in illos ex peccato Adami? Quaro, inquam, quomodo censeantur Gentiles illi post Adamum geniti; peccavisse ad similitudinem transgressionis Adami; & quomodo putentur mortui ad similitudinem mortis Adamicæ? Gentiles inquam illi, quos ex Pre-Adamitarum hypothesi, non ab Adamo, sed ab ante Adamum creatis hominibus, oriundos statuo: ad quos neque fando unquam pervenit, vel Deus Adami, vel lex Dei data Adamo, peccatum vel mors Adami; quin neque Adamus ipse: & quorum idcirco in his imputationibus Adamicis, par omnino & eadem causa est cum Gentilibus ante Adamum conditis; quibus utique, neque Deus ille Adami, neque Adamus ipse unquam innotuit. Demonstrabitur autem paulo inferius, non ideo fuisse imputatum peccatum Adami, Gentilibus illis post Adamum genitis, quatenus illos Adamus genuit. Probabitur enim, non imputari quod manat ex traduce, sed imputari proprie, quod non materialiter generatur.

CAPUT XXII.

Analysis continua horum versuum Apostoli.

His ita explicatis, ut magis elucescant; eliciamus & contexamus hinc continuam, quam in partes se-

secuimus, horum versuum analysin : qua talis erit.

Versus XII. Sicut per temeratam legem Dei ab uno homine, peccatum intravit in mundum, & per peccatum mors: ita mors opsonium peccati & proprium peccati inseparabile, pervasit in omnes homines, in hoc peccato, vel homine, in quo omnes peccaverunt. Quemadmodum per illam legis Dei transgressionem, peccatum imputatum fuit omnibus hominibus: ita mors, per illam peccati imputationem, regnavit in omnes homines.

Versus XIII. Certe, antequam lex Dei esset, antequam lex Dei esset violata; & usque ad legem Dei, usque ad legem Dei violatam, peccatum erat in mundo, & legem Dei precedebat. Sed illud peccatum non erat proprie peccatum; quia peccatum, proprie est transgressio legis Dei: at non existente lege Dei, nullum esse censebatur peccatum: non putabatur, quia non imputabatur. Peccatum tunc temporis censebatur tantum, vitium inhaerentis & innata corruptionis in homine; in carne, in materia & natura hominis corruptioni obnoxia. Mors vero putabatur tantum effectus naturalis corruptionis illius: nondum enim decreta erat contra peccatum, quia lex nulla à Deo lata erat, qua imputationis notam peccato inuississet. & peccatum proprie dictum constituisset. Sed à momento illo quo lex Dei fuit, quo lex Dei violari cœpit; peccatum quod non antea putabatur, exin cœpit imputari: mors qua antea privatio tantum erat, exin cœpit esse quid positivum, quid vivens, quid regnans. Mors eadem illa qua falce instructa erat, ut secundum ordinem natura omnes homines demeteret: gladio armata est, ut secundum institutum legis, merum imperium in omnes homines ageret.

Verum inquires; quod est illud momentum, à quo lex Dei fuit, à quo lex Dei violata fuit: à quo peccatum imputari, mors regnare cœpit?

Versus XIV. Regnavit mors ab Adamo. Regnavit mors ab illa transgressione legis Dei, quam Adamus perfregit. Regnavit mors ab Adamo, quia imputari cœpit peccatum ab Adamo. Regnavit mors ab Adamo, & per-

pervasit in omnes homines, ut peccatum Adami, & peccata omnium hominum qui in illo peccaverant, damnatione animadverteret.

Constat de principio; videamus finem istius regni. Regnavit mors ab Adamo, usque ad Moysen Vel usque ad legem Moysi, & quamdiu lex Moysi obisnuit. Regnavit mors usque ad mortem legu Mosaiica: vel quod idem & clarius est; usque ad adventum & mortem Domini nostri Iesu Christi: qui legis fuit consummatio, peccati & mortis consumptio. Nulla enim est imputatio peccati, nulla est damnatio mortis is qui sunt in Christo.

Imputatio autem illa transgressionis Adami tantum valuerat; ut mors qua ex ejus condemnatione sequebatur, regnauerit non solum in illos, qui deinceps & post Adamum peccaverunt, ad morem transgressionis illius, ad morem peccati imputati: sed etiam retro renaverit in eos qui retro peccaverant; non ad similitudinem transgressionis Adamica, sed ad similitudinem peccati non-imputati, quod erat ante legem illam quam Adamus violavit.

Ille vero Adamus typus erat, sed typus oppositus futuri Adami; id est, Iesu Christi. Ille erat primus Adamus: hic secundus Adamus. Quemadmodum per illum primum Adamum, peccatum quod erat ex transgressionis legu Dei, intravit in mundum, & per peccatum mors; ita etiam per hunc secundum Adamum absolutio de peccato illo intravit in mundum, ac per illam absolutionem vita. Quemadmodum in omnes homines mors pervasit, in illo primo Adamo in quo omnes peccaverunt: ita etiam in omnes homines vita pervasit, in hoc secundo Adamo, in quo omnes peccati Adamici in fontes evaserunt: Ac demum: quemadmodum mors qua obtinuit à peccato primi Adami, regnavit in illos homines qui non peccaverant ad similitudinem peccati imputati; sed qui peccaverant ad similitudinem peccatorum antecedentium; id est, non imputatorum; qualia erant peccata facta ante legem: Eadem ratione, vita qua obtinuit per gratiam absolutionis illam, quam generi humano comparavit secundus Adamus, regnavit in eosdem. Sive, quod perinde est; praeterit

terit & deleuit Christus, placamentum ad hoc à Deo propositus, peccata illa antecedentia, infecta reatu & imputatione peccati Adamici. Qua est absoluta comparatio inter utrumque Adamum, primum & secundum.

CAPUT XXIII.

Adamum dici primum hominem, qua ratione Christus secundus homo est.

Objicitur, Adamum vulgo dici primum hominem. Sed facile erit responsum, si dicimus, Adamum esse primum hominem, qua ratione Christus dicitur & est secundus homo. Relative nimirum & typice dicuntur invicem Adamus & Christus; ille primus homo, hic secundus homo. Notandum porro illud est curiosus quod alias tetigi, & identidem inculcandum mihi est. Adamum & Christum, propositos esse hominibus, tanquam duos oppositos imputationum terminos: unum, damnationis propter crimen: alterum, purgationis de crimine: ambos, qui homines omnes imputationibus suis involverint: homines, inquam, præteritos & futuros: & qui retro longissime ante illos creati erant, & qui post illos longissime progeniti sunt & progignentur.

Quod ut sensibilis comparatione intelligatur: concipiamus omnes homines, quotquot creati sunt à principio temporum, & procreabuntur usque ad finem seculorum, similes esse a sculo illi Virgiliana,

Quæ tantum vertice ad auras

Aërias, quantum radice ad Tartara tendit.

Comparemus radices arborum illius, qua ad terram & Tartara ipsa defiguntur; hominibus illis ante Adamum creati, à principio temporum: quorum notitia sepulta, & seculorum ignorantia abscondita est. Comparemus comas illius a sculo ad cælum usque luxuriantes; hominibus illis qui nati sunt à Christo, vel à tempore Christi, & qui nascentur usque ad finem seculorum. Comparemus denique truncum illius arboris; hominibus illis qui intercesserunt ab Adamo ad Christum. Trunco vero illi concipiamus duos surculos immixtos, qui in truncum ipsum coaluerunt,

runt, inter radices & ramos aesculi: primum, Adamum: secundum, Christum. Ponamus Adamum primum surculum, trunco illi primo insertum, qui succo suo peccati & mortis arborem totam infecerit, ab imis radicibus ad summa usque ramorum fastigia. Ponamus Christum secundum surculum, trunco eidem illi & deinceps inolescens; qui arborem illam medicaverit, eamque à radice ad verticem spiritu suo justitia & vita imbuerit. Ponamus, inquam, plantas duas illas trunco illi immixtas, inter radices & ramos arboris: quales posuimus Adamum & Christum, inter homines illos qui à principio creati sunt, & eos qui ad finem usque porro gignentur, Condiscamus hinc tandem, quod quemadmodum non necesse fuit, Adamum secundum & ultimum, fuisse ultimum omnium hominum, ut præteritos tantum homines sub justitia sua comprehenderet. Ita neque necesse fuit Adamum antecedentem & primum, fuisse primum omnium hominum, ut futuros tantum homines sub peccato suo concluderet. Condiscamus, inquam, Adamum dici primum hominem, quia ratione dicitur Christus secundus homo.

CAPUT XXIV.

Adamum dici primum hominem, quia ratione primus homo peccator est. Imputationem peccati Adami non fluxisse ex Adami traduce.

IMo inquires; non dicitur Adamus, ratione illa tantum, primus homo: sed & dicitur absolute, primus & pater omnium hominum. Respondeo; Adamum dici iidem posse primum & patrem omnium hominum, quatenus homines omnes in illo peccaverunt; & quatenus primus & pater omnium peccatorum est. Simili ratione dicitur Abrahamus pater omnium credentium, imo pater Adami ipsius, quatenus Adamus credidit, & quatenus ex fide justificatus est. Ita Christus vocatus est primitiæ resurrectionis; & primus omnium hominum qui resurrexerunt; quamvis alii resurrexerint longe ante Christum, scriptura sacra teste. Dicitur Abrahamus pater

pater omnium credentium ; quoniam fides imputatur omnibus credentibus ex fide Abrahami. Vocatus est Christus, primitia resurrectionis, & primus omnium qui resurrexerunt, quoniam resurgitur in Christo & per Christum. Simili argumento, nuncupatur Adamus primus & pater omnium hominum, quia primus homo peccator, quia pater omnium hominum qui peccaverunt, quia peccata fuere imputata omnibus hominibus ex peccato Adami, quia omnes homines peccaverunt in Adamo.

Neque vero necesse fuit, omnes homines duxisse originem ab Adamo, ut censerentur omnes peccavisse in Adamo, vel ut ei peccatum Adami imputaretur. Vitium certe naturale & materiale peccati, derivatur extraduce; sive ex vitio natura humana, & materia ejusdem ex qua Adamus & ipse formatus est. Sed vitium imputationis, sive imputatio ipsa peccati Adamici, qua pure est intellectualis, emanavit à transgressione legis quam Adamus violavit, nulla adhibita generatione naturali: quatenus intelligitur transgressio Adami mystice effusa in illa omnia qua imputationi Adamica subiacebant.

Ita quando ira Domini servavit in sexaginta mille Iudaeos propter peccatum Davidis: putandumne ergo fuit, Iudaeos illos oriundos ex Davide, ut eis peccatum Davidis imputaretur? Nevisquam. Imo illis peccatum Davidis imputatum fuit, quatenus David princeps eorum & caput erat; quo nomine referebat populum omnem Iudaicum; & qua ratione populi dicuntur plebs, propter diliramenta suorum Regum. Ita quando fideles omnes, Iudaei & gentiles, dicuntur filii Abraham; anne ideo censendum est, gentiles natos esse ex semine Abrahami, ut illis imputetur fides qua est ex Abrahamo? Vel rursus: anne ideo censenda est imputata fides Abrahami Iudaeis ipsis, quatenus Iudaei sunt semen Abrahami, & quatenus ab illo naturali generatione prognati sunt? Nihil minus. Sed dicuntur ratione spirituali, & mystica, Iudaei & gentiles, filii Abrahami: quatenus Abrahamus, quoad fidem, vices sustinuit omnium fidelium Iudaeorum & gentilium: & qua ratione sola dictus est indefinite, pater credentium. Hinc nimirum

rum est, quod tam subtiliter D. Paulus disputavit capite 9 ad Romanos: non omnes Iudaos ex semine Abrahami, reputandos in filios Abrahami: sed illos tantum qui sunt filii Abrahami, secundum promissionem & fidem: id est, secundum spiritalem Abrahami generationem. Idem prorsus statuendum est de imputatione qua est ex gratia Christi. Nullus enim natos habuit Christus, natos inquam secundum carnem, quibus imputaret suam gratiam. Plures certe propagavit spirituales filios, super quos purgatio & gratia ejus spiritaliter & mystice effusa est; non materialiter, non carnaliter, neque ex traduce.

Sed & imputationem illam ex peccato Adami non fluxisse in omnes homines ex Adami semine, demonstratur clarissime per exemplum Mundi totius, cui peccatum Adami fuit aque imputatum. Terra enim maledicta fuit propter peccatum Adami! & totus orbi labem imputationis accepit ex peccato illo. Nullus autem dixerit, Mundum oriundum vel natum esse ex Adamo. Sufficit nempe credidisse, Adamum mysticam induisse personam mundi totius & omnium hominum. Cui Adamo tanquam Syndico & defensori rerum omnium creatarum, significata lex Dei, censeretur significata toti mundo & omnibus hominibus. Quam legem Dei si violaret homo ille, nomine illo quod praeferbat, & quo referebat creationem universam, imputaretur illi homini, & omnibus hominibus, & toti mundo; Imputaretur inquam peccatum illius hominis omnibus hominibus, praeteritis, praesentibus, & futuris: qua ratione fides ex Abrahamo, imputata fuit fidelibus omnibus, praeteritis, praesentibus, & futuris: qua ratione idem Christi obsequium; quo vicem Adami pensavit, imputatum fuit omnibus hominibus, praeteritis, praesentibus, & futuris.

CAPVT XXV.

Explicatur D. Paulus Actorum capite 17. Ex uno sanguine, non esse, ex uno Adamo.

Non movet me quod introducitur D. Paulus in Arcopago dicens, Actorum capite 17. Deum fecisse totam hominum gentem ex uno † sanguine. Non enim concluditur hinc, ut vulgo receptum est, homines omnes oriundos ex Adamo. Imo illud tantum, Deum compegisse omnes homines, ex una eademque materia, ex una eademque terra, ex uno eodemque pulvere, ex una eademque carne, ex uno eodemque sanguine. Qua locutio vulgaris est in sacris literis. Ecce & me sicut & te fecit Deus: & de eodem luto ego quoque formatus sum: ajebat Elin ad Iob. Tale illud est Domini nostri D. Petrum alloquentis. Simon Barjona, caro & sanguis hæc non retexit tibi. Nec praterendum est quod hoc loco Actorum, signate distinxit Apostolus materiam à progenis hominum. Materiam fecit ex sanguine: progeniem duxit à Deo. Ubi dixit, Fecit ex uno sanguine totam hominum gentem. Deinde conclusit; Progenies ergo Dei cum simus. Non dixit, Progenies Adami cum simus. Quippe qui alloquebatur, non Iudaos, sed Athenienses gentiles: & respiciebat, non particularem illam creationem Adami, qua Deus Iudaos in Adamo sibi peculiariter finxit & efformavit filios: sed generalem illam, qua Deus naturam ipsam, & omnes homines ad sui imaginem creavit: & secundum quam imaginem dicuntur indistincte omnes homines progenies Dei.

† Vulgata editio vertit, ex uno simpliciter, sed in autographo Græco legitur expressim, ἐξ ἑνὸς αἱματός, ex uno sanguine.

CAPUT XXVI.

Exercitationis epilogus.

EXegi qua habebam super his versibus Apostoli, de imputatione peccati, & de regno mortis, ab Adamo: nec non de hominibus illis qui non peccaverant ad similitudinem transgressionis Adami; quos peccavisse ante Adamum posui. In quibus tria sunt qua benignus lector perpendat velim.


Primum est. Commodius multo responderi posse objectionibus illis, quas intentat in hanc nostram positionem vulgata opinio; quam responderi queat intricatis illis incommodis, qua mea hac positio attulit contra vulgatam opinionem.

Secundum est. Nullum prorsus oriri incommodum (quod mihi saltem visum fuerit) expositione hac: imo è contra commoda multa ex illa percipi. Lucem magnam affert, cum Evangelio, & versibus his D. Apostoli; tum etiam historia Geneseos. Conciliari Genesim & Evangelium, cum Astronomia veterum, Historia & Philosophia gentium vel antiquissimarum. Itaque si venerint Chaldaei ipsi, vetustissimi illi Astronomi, penes quos erant rationes cursus siderum, à multo retro centenis annorum millibus (ut ajunt) composita & confecta: si venerint antiquissimi Aegyptiorum Chronologi, cum antiquissimis Regum suorum dynastiis: si venerit Aristoteles ipse: si venerint cum Aristotele Sinenses, philosophi & chronologi fortasse eximii: vel si qui olim reperientur sagaces apud Australes & Septentrionales incognitos: quibus, sicut & Sinensibus, Aegyptiis, & Chaldaeis, sua sibi sint epocha, à pluribus annorum myriadibus tradita & cognita: Accipiant ultro illi omnes expositione hac historiam Geneseos, & fiant lubentius Christiani.

Tertium est quod unice benignum meum lectorem oratum volo. Ut quacunq; hic congesti, scripta putet

*Exercitationis gratia. Nihil enim ausim asserere de his
qua videntur parum convenire cum recepta opinio-
ne totius Ecclesie. Cujus preceptis, atque illud ite-
rum edico, totum me sine fraude & devotissime ad-
dico.*

Deo duce & auspice.



7

I,

M

L
89^a

ANNO SALU
M. DC. LV

52,
Exc
qua
ne
rum
dico

Fol. 53.

CTÆ

O.

